

بِسْمِ اللَّهِ الرَّحْمَنِ الرَّحِيمِ

إِنَّ الدِّينَ عِنْدَ اللَّهِ الْإِسْلَامُ



إِلَهَ الْأَلْبَانِ مُحَمَّدٌ رَسُولُ اللَّهِ

## **KHUTBA JUMMAH**

**HADHRAT MUHYI-UD-DIN AL-KHALIFATULLAH**

**MUNIR AHMAD AZIM**

08 Mars 2019

30 Jamadi'ul Aakhir 1440 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :

### **JIHAAD : PAS PAR LA FORCE !**

Allah dire dans Quran :

لَا إِكْرَاهَ فِي الدِّينِ

**Laa-Ikraaha fid-Deen.**

« Pas ena aucaine contrainte dans la religion. »

(Al-Baqara 2 : 257)

Sa li en effet ene de bane versets Quran ki pli populaire et en plus de sa, li d'actualité, vu bane conditions ki pé prévaloir azordi jours. Même bane ki ignore totalement bane l'enseignements Quran Shareef, fine déza gagne bane échos de sa. – Sa verset là fer ressortir bane rapports entre la religion – en l'occurrence l'Islam – et servi la force (pour contraindre bane dimounes), et à ki niveau la contrainte capave ena l'influence lors bane croyances religieuses.

Certains *Ulémas* de bane les autres Jamaat rode prouver, après sa verset là, ki capave servi la contrainte (la force) en matière de la religion, mais nous, le Jamaat Ul Sahih Al Islam démontrer le contraire.

Le Jamaat Ul Sahih Al Islam accepter sa verset là dans so intégralité, et apprécier parfaitement so message. Ene l'autre aspect de sa l'enseignement là, ki différent de celui de bane orthodoxes, fine mette en avant par le Jamaat Ul Sahih Al Islam. Non seulement, li pas permette pou ena kit doute lor l'interdiction pou servi la force, quelle que soit so forme en matière de la foi, mais li impossible pou atteindre le but recherché par bane tels moyens. C'est d'ailleurs saki sa verset là en question pé indique nous.

## DEUX FORMES DE CONTRAINTES

La contrainte capave de deux façons :

1. Servi la force pour propage ene religion.
2. Rasse ene kikaine, par la force de so religion.

Donc sa verset là indique nous ki nous pas capave force kikaine pou accepter ene nouvo la foi, et encore moin, nous pas capave force li pou renonce à so la foi. Mais bane ki faire le tout pour le tout pour dissocier l'Islam de so bane croyants ki plus fidèles, pas pou réussi dans zot plan, parski dans même verset, Allah dire nous plus devant :

**“... et quiconque croire dans Allah fine certainement saisi ene poignée solide et incassable...”** (Al-Baqara 2 : 257).

C'est sa la signification ki pli correcte de sa verset là. Bane ki pas convaincu ki nous pas capave force ene kikaine pou embrasse ou renonce ene religion, nek ena pou essayer, et zot pou trouver. D'ailleurs l'histoire confirme la véracité de sa verset Quran là.

## LA PRATIQUE DE L'ISLAM PAR LA FORCE

La sensibilisation de la population par rapport à la sincérité, l'honnêteté, le patriotisme, la paix, la protection de bane droits de bane dimounes et bane les

autres l'enseignements Islamiques, constituer une grand projet de bane gouvernements et bane dynasties islamiques et non-islamiques aussi. Mais selman zot fine mal organise zot et mal faire kan zot fine oulé servi la force. Par exemple, dans sa siècle présent là, bane l'autorités Ahmadis servi sanction et boycotte pou oblize bane chercheurs de vérité pou cause menti contre le Khalifatullah et la Manifestation Divine.

Sak Musulman Ahmadi sincère ena une ferme croyance ki l'Islam li une religion divine, li croire dans l'unicité d'Allah du fond de so lé cœur, li croire ki Hazrat Muhammad (saws) li le plus grand et le sceau de tous bane prophètes d'Allah. Bane Ahmadis croire ki la porte de *Nabuwwat* pou reste tous les temps ouvert, et ki bane élus d'Allah, bane messagers et prophètes d'Allah pou continuer vini dans l'*Ummah* du Saint Prophète Hazrat Muhammad (saws), sans ki sa casse dans n'importe ki façon la supériorité de *Nabuwwat* du Saint Prophète de l'Islam (saws). Mais selman azordi bane autorités Ahmadis à travers brutalité et la force oulé fer croire le contraire à bane membres du Jamaat Ul Sahih Al Islam et à bane les autres chercheurs de vérité, et pou fer sa travail là, zot menace sa bane dimounes là et fer pressions lor zot. Azordi, c'est zis lors la lèvres ki la porte de *Nabuwwat* li ouvert, surtout dans zot arguments contre bane les autres musulmans, non-Ahmadi ; mais en réalité, dans la pratique, zot fine bel et bien ferme sa la porte là, kot zot dire ki après le Messie Promis Hazrat Mirza Ghulam Ahmad (as) pas pou ena bane les autres messies ou prophètes Islamiques ki pou vini, et ki *Khilafat* après le Messie Promis, ki d'après zot pou continuellement élu par l'homme pou contigner régner pour tous les temps ! Voilà zot double pensées, zot double face ! Zot dire une kitchose, et zot croire lotte kitchose ! Sa li complètement contraire à saki nous bien-aimé prophète Hazrat Muhammad (saws) et le Messie Promis Hazrat Mirza Ghulam Ahmad (as) fine enseigne nous.

Couma une Jamaat (couma Jamaat de Hazrat Massih Maoud (as)) capave revendiquer ki li universelle, internationale ou globale, et lor là ki li prêche la paix, et ki faudé pas ena la haine pour n'importe ki sanlà, mais selman zot cause autant frictions coumsa ?

Aucune religion véridique ki possède une message universel et l'ambition pou unir l'humanité sous so bannière pas capave pou une instant penser pou servi la force pour propage so message. Persécution, boycotte, l'ordre pou coupe bane relations familiales, bane sanctions sévères – en somme, la frayeur pour bane

créatures – capave conquérir des milliers de bane dimounes, mais pas zot les cœurs. Sa frayeur là capave faire zot la tête courber, mais pas zot l'esprits. L'islam interdit ki nous servi la force pour barre le chemin ki amène vers Allah et So Serviteur Choisi (l'Élu d'Allah de l'époque).

De ce fait, la force li pas nécessaire. C'est à ene dimoune pou réfléchi et choisir pour li-même kot sa la vérité là trouver. En adressant le Saint Prophète (saws), Allah expliquer ki faudé pas li mette dans so l'esprit ki la réforme de la société pou capave vine possible en utilisant la force.

Même si la lutte et bane réactions violents développer au cours de sa processus de la propagation d'ene nouvo idéologie, l'islam (et plus particulièrement, le Jamaat Ul Sahih Al Islam) exhorte so bane adhérents pou montrer ene plus grand patience et persévérance, dans le but pou évite le conflit, dans la mesure du possible. Sa c'est à cause l'islam repose uniquement et entièrement lor la force de bane arguments et non pas lor la puissance matérielle ki capave être déployé.

Tous bane idéologies pou exterminer (pou fini) excepté celui de l'islam – le Sahih al Islam ki fine revivre par l'aide divine pour consolide So religion, vrai la foi – c'est-à-dire, **L'ISLAM**. Tous bane plans pou floppe excepté le plan d'Allah à travers le Jamaat Ul Sahih Al Islam, et sa plan divine là pas pou couler, ni ene kikaine ou kit entité pou capave contrecarré sa, et Allah dans So plan pou certainement anéanti bane forces du mal. *Insha-Allah, Ameen.*

## LA VÉRITE LOR LE JIHAAD

Fine arrive l'heure pou dissipe tous bane malentendus et déclare formellement ki l'islam interdit servi la force en matière de la religion. D'ailleurs, à nous connaissance, l'islam li seul la religion ki garanti la liberté de conscience dans so texte sacré, et li exhorte bane musulmans pou ena respect pou bane temples, les églises et synagogues de bane disciples de bane les autres religions. Nous dénonce et rejette comme totalement fausse et diffamatoire à l'égard de l'islam et du prophète (saws) le point de vue de bane soi-disant savants et *Mullahs* de l'islam ki ena comme plan pou créer la division et l'insécurité parmi bane musulmans et ki accroche zot au pouvoir de sa lé monde là, en délaissant bane vrais l'enseignements divines.

La plupart de bane sectes musulmans pé attane touzour la venue d'ene réformateur ou d'ene Mahdi ou d'ene Messie ki pou ene dimoune ki pou fanne disang et ki pou appelle Imam Muhammad, et le Messie Promis, d'après zot, pas pou autre ki Jésus, fils de Marie en chair et en os. Ensam, sa deux dimoune là pou parcourir la terre et pou touye tout bane ki pou refuse vine musulman. Sa c'est l'opinion lor *Jihaad* ki sa bane sectes musulmans là croire. Fine être prévu ki le Messie Promis pou mette fin à la guerre.

Le Messie Promis et le Mahdi zot deux titres pour ene même dimoune pour la ré-interprétation du Quran Shareef selon bane besoins de l'heure. L'enseignement lor *Jihaad* couma fine interprété et propagée par bane théologiens musulmans de sa l'époque là, kot appelle zot *Maulvis*, bane soi-disant *Mullahs* li totalement fausse. Sa doctrine là pas capave amène nannié de bon, kot au lieu de sa, li pou transforme bane dimoune dans sa le monde là en bane bêtes féroces et pou prive zot de tous bane bons qualités humaines.

C'est effectivement saki fine arrivé. Mo conné avec certitude ki le fardeau de péchés de sa bane dimoune ki fine commette bane crimes par ignorance et seulement à cause de sa bane péchés là, et ki pas conne raison ki faire l'Islam fine bizin livrer bataille à so tous débuts, tous sa bane fardeaux là en effet repose lor z'épaules de sa bane *Maulvis* ki contigner propage secrètement sa bane doctrines dangéré là ki cause par la suite beaucoup de bane pertes de vies humaines. Kan sa bane même *Maulvis* là alle zoine bane officiers du gouvernement, zot courber devant sa bane là, comme si zot pou alle prosterner devant zot ; mais kan sa bane *Mullahs* là tousel entre zot, zot cause bel causer et zot soutenir le fait ki le pays en question bizin vine ene base la guerre et ki pou propage la foi, bizin pointe l'épée lor ene kikaine et ki sa li ene devoir obligatoire pou zot. Ena bien tiguette parmi sa bane *Maulvis* là ki pas pense pareil couma zot. Mais la grande majorité d'entre zot, zot tellement encré dans sa fausse doctrine là, ene doctrine ki complètement opposée à Quran Shareef et à bane l'enseignements du Saint Prophète (saws), ki zot condamne et qualifié tout bane ki ena ene l'opinion différent de saki pou zot couma ene *Dajjal* (anti-christ), et zot proclamer ki faudé touye ene tel dimoune sans aucaine crainte.

Mo l'objet de bane tels condamnations depuis longtemps même. Sa bane *Maulvis* anti-Islam là bizin mette dans zot l'esprit ki sa doctrine de *Jihaad* couma zot ena en tête li pas bon ditout.

En premier lieu li supprime la sympathie pour bane être humains. Zot façon de penser ki *Jihaad* fine autorisé dans bane premiers temps de l'islam, et ki faudé pas ena kit barrière kifer li pas autorisé azordi jour ; sa kalité pensée là li bien pas bon. Li déplorable et li ene égarement. Nous ena deux réponses pou donne sa bane dimounes (*Mullahs*) là. Premier, c'est ki le Saint Prophète (saws), pas fine zamais prend l'épée excepté contre bane ki fine en premier servi l'épée et massacré sans pitié bane innocents et bane justes, parmi bane z'hommes, femmes et zenfants. C'est saki aujourd'hui même la loi mondaine, la loi internationale qualifier comme légitime défense. Sa bane dimounes (musulmans) innocents là ti touyer d'ene façon tellement cruelle ki même azordi jours, kan nous tanne sa, nous larmes couler.

Deuxième, même en supposant pour ene moment ki au commencement de l'islam ene tel *Jihaad* ti obligatoire, couma sa bane *Maulvis* là croire – ene fausse croyance, mais selman sa li pas valable pour nous l'époque. Fine en effet écrire ki kan le Messie Promis pou vini, le *Jihaad* avec l'épée et tous bane la guerres religieuses pou arrêter. Parski li pas pou servi l'épée ou kit les autres z'armes de sa lémonde là, mais so sel z'arme pour so bane la prières, et so l'épée pou so grand détermination. Li pou établir bane fondations de la paix et pou rassembler bane lions et bane moutons. So l'époque pou celui de la paix, de la bonté et de la sympathie humaine. Kifaire sa bane dimounes là donc pas réfléchi lor sa fait là ki plisse ki quatorze cent ans de sa, le Saint Prophète (saws) fine dire en séki concerne le Messie Promis ki li pou mette ene fin à la guerre.

Ô ou, bane théologiens musulmans et *Maulvis*, écoute-moi. En vérité, mo dire zot ki c'est pas le moment pou la guerre entre nous pour la foi. Pas désobéir le Saint Prophète (saws). Le corps de l'islam faudé pas divisé. La foi islamique réclame ene unité et ene la foi solide dans l'unicité d'Allah. Allah Li unique, et c'est So l'aide ki nous bizin roder dans tous circonstances. L'islam li pas ene pays ou dimoune en particulier. L'islam li pas l'Arabie Saoudite, ou Pakistan, ou l'Inde ou kit les autres pays kot bane musulmans zot par millions. L'islam c'est zot, c'est moi kan nous soumette nous couma ene sel lé corps, comme ene seul l'âme à Allah avec contentement et en recherchant zis So l'amour et So contentement.

Le *Jihaad* avec l'épée et tous bane la guerres religieux bizin arrêter. Mais l'exception bien sûr reste la légitime défense, c'est-à-dire, zot répliquer zis kan

tout limite fine dépasser et ki zot la vie en danger, quand l'ennemie de l'islam pé rode touye ou, ou sois ki ou frère ki dire ki li ene musulman mais ki agir de façon anti-Islamique oulé fer ou ditort zis à cause de ou la foi. Là, dans sa cas précis là, li fine permette pou ou pou répliquer, pou défendre ou-même en plaçant ou confiance dans Allah.

La guerre dans le chemin d'Allah pas veut dire en aucaine façon ki bizin faire bane attentats suicides couma certains extrémistes ki déforme bane paroles d'Allah et du Saint Prophète Muhammad (saws) faire. Le suicide li condamnable dans l'islam. C'est pas le jardin du paradis ki pé attane sa bane dimounes là, mais bien l'enfer. Ki Allah aide la Communauté Musulmane dans so l'ensemble pou bien comprend sa et pou reste dans la limite du permissible. *Ameen.*

Le fait ki sa sujet là li bien vaste, *Insha-Allah*, mo pou ré-vine lor là un peu plus tard. Ki Allah gagne pitié de nous, bane musulmans, et donne nous le courage et l'intelligence pou unir nous pour consolide l'islam, et bane vrais l'enseignements d'Allah dans le monde. *Insha-Allah, Ameen.*